



Komunikado di prensa 2020-037

CBCS nombrá Presidente Transitorio di International Forum for Investor Education (IFIE)

Willemstad/Philipsburg - *Centrale Bank van Curaçao en Sint Maarten (CBCS)* a keda nombrá komo Presidente Transitorio di International Forum for Investor Education (IFIE), un organisashon internashonal pionero, fundá na 2005 pa entidatnan regulatorio di Australia, Canada, Hapon, Korea, Reino Uní i Estádus Unídos.

IFIE ta un organisashon pionero riba tereno di kompetensia finansiero, resistensia finansiero i strategia pa edukashon di invershonista. IFIE ta traha riba fortalesementu di e rekursionan nesesario pa krea i implementá norma, *best practice* i strategia, trahando ku su miembronan, partnernan i partinan interesá di tur sektor i hurisdikshon.

IFIE ta konsultá i kolaborá ku International Organization of Securities Commissions (IOSCO) i ku Organization for Economic Co-operation and Development (OECD), kompartiendó informashon i rekurso i trahando huntu riba e trabou krusial di desaroyá e tereno di kompetensia finansiero/edukashon di invershonista na nivel di maneho, di desaroyo di kapasidat i liderazgo i na nivel di implementashon. Ademas, IFIE ta traha komo partner di otro partinan interesá manera Aflatoun International, pa fortifiká e rekursionan disponibel mundialmente pa implementashon di inisiativa riba tereno di edukashon finansiero i sosial.

CBCS, representá pa Sr. Errol Cova, lo tin e enkargo di dirigí e organisashon mundial akí atraves di e tempu difisil aktual, te ora e siguiente hunta keda elegí na sèptèmber di 2021. E kompromisonan internashonal di alto nivel ku e enkargo akí lo trese kuné lo hisa e nivel di visibilidat, rekonosementu i reputashon di nos infrastruktura regulatorio (i di supervishon), kontribuyendo asina na desaroyo di nos supervishon finansiero i di merkado di kapital. Ademas, CBCS por hasi bon uso di IFIE pa mehorá e kuadronan regulatorio pa protekshon di konsumidó i invershonista, loke por resultá den un merkado di kapital i finansiero (lokal) ku ta funshoná mihó i ku ta bon adaptá na e merkadonan internashonal.

Esei lo hasi nos un destinashon mas atraktivo pa e institutonan finansiero internashonal, ku un merkado mas dinámiko i vibrante, loke na su turno lo kontribuí positivamente na kresementu ekonómiko, prosperidat i bienestar finansiero di Kòrsou i Sint Maarten.

Hunta di IFIE ta konsistí di miembro di diferente organisashon mundial manera: IOSCO, (organisashon ku ta fiha norma internashonal), CFA Institute (organisashon internashonal riba tereno di kualifikashon profeshonal), FINRA (entidat regulatorio estadounidense), OSC (entidat regulatorio kanades), EFAMA (federashon europeo di fondo di invershon), ANBIMA (entidat regulatorio brazilero), JSDA (entidat regulatorio hapones) i otro outoridatnan regulatorio di merkadonan avansá. Mas informashon riba IFIE ta disponibel riba nan wèpsait <https://www.ifie.org>.

Willemstad, 2 di desèmber 2020

CENTRALE BANK VAN CURAÇAO EN SINT MAARTEN